


BAKURUBASANNI
(nimoré 12 songo)

Mali kono = Dôrôme 300

Afiriki kono = Dôrôme 600

Jamana wêre = Dôrôme 1000

Zuluyekalo san 2009



Kunnafonisèben bota kalo o kalo. BP: 24 Téléfoni : 20-21-21-04. Bosola Bamako-Mali. San 37nan boko 450nan A songo : dôrôme 15


Sotélima bilala kenyeréyew ka bolo kan

Mali téléphoniko cakèda n'o ye «SOTELMA» ye, a bilala kenyeréyew ka bolo kan san 2009 zuluyekalo tile 7. Marokujamana téléphoniko cakèda do y'a san n'o ye «Maroc Telecom» ye. Kémésaradala a niyoro kéra 51 ye. A ye sefawari miliyari 180 don a dafé. Sotélima feereli sèben tegenobilala Kuluba Mali ni Maroku ce. Kunnafoni n'a dicogo kura minisiri Madamu Jara Mariyamu Filance Jalo ni nafoloko minisiri Sanusi Ture tun be ka Mali jöyoro fa, Abudesalamu Ahizuni tun be kene kan Maroku telekomu togola. Ale ye Maroku telekomu nemogo ye. Jamanakuntigi Amadu Tumani Ture fana tun be kenc kan ani minisirinemogo Modibo Sidibe, ka fara minisiri caman wêrew kan.

Madamu Jara Mariyamu Filance Jalo y'a jira, ko kabini Sotélima feereliko fôra san 2008 desanburukalo tile 22 la, k'a baara bëe latème ni jelenya ye. K'a damine san 2009 zanwuyekalo tile 12 la, ka se sisan ma, kenyeréye cakèda naani (4) de tun y'a kandi Sotélima sanni kama. Maroku Telekomu ka wari hake de tun ka ca n'a tòw ta ye. A tun ye miliyari 165 fo.

Kunnafoni surunw

Mogow te darakako dabila munna? Mogo mana da sufé fo ka taa a fo a wulila sogoma, a b'i n'a fo a tun be sun na. A be daraka min dun o kofé, o be funteni don farikolo la, k'a hakili dayèle, min b'a to a ka se ka tile girinkajo damine konuman nisondiya la. O de la n'i panna daraka kunna, sanni tilelafanaduntuma ce, kongo b'i tooro kosebè. Mogo ka kan ka daraka nenama dun sogomada fe; o be fanga don farikolo la. Nka n'i ma fen dun sogomada fe, hali n'i sigira tilelafana kunna, ifaritewalanwalan a dunto. Dumuni be sigi i da ma, a nege te don i la.



Sotélima bora Mali taya la ka yelema Maroku telekomu ka bolo kan

Ô ma ke jamana nemogow sago ye. U teremena ka ben miliyari 180 sarali kan. Abudesalamu Ahizuni y'a ka cakèda mankutu kosebè. A k'u be baara la Moritani; o ye «Mauritel» ye; u be Burukina faso; o ye «Onatel» ye; u be Gabon, o ye «Gabon Telecom» ye. Maroku telekomu tun ye Marokujamana goferenamacakèda ye; a bilala kenyeréye

bolo kan san 2004. Cakèda in nemogó y'a jira k'o de kéra sababu ye, a ka fangaba soro.

Sotélima sannisèben donna jamanakuntigi Amadu Tumani Ture bolo Madamu Jara Mariyamu Filance Jalo fe; n'o ye kunnafoni n'a dicogo kura minisiri ye.

Madiba Keyita
Dokala Yusufu Jara

KONKO

San 2009 / 2010 sene kampani kunnafoni

ANAP ya naniyaw waleya ka wasa

Agad Bori Bata Maden Bori walima Abubakari filanan sera

gouli kore

Agadegereke abla ka san 2008 seerevasében

Agad kore n° 84nan : Jamana fangan'a psonw

Agad n° 60nan : Denmisennin ka sunogó kolosili nafa ka bon

Agad Wasiti, Direyi sorofakoro

Agad Kora si Jamana kunligi nege bora jamanadenw na

Agad CAF : Stadi boko ibo gleyara

pe 2

pe 3

pe 4

pe 5

pe 8

pe 9

pe 10

pe 11

pe 12

San 2009/2010 sene kanpani kunnafonni

Sene minisiri Agatamu Agi Alasani ye kunnafonidilaje ke jumadon zuwenkalo tile 26 san 2009, sene kanpani kunkan.

Fen min ye san 2008/2009 sene kanpani soroko ye, Mali seneko nemogoba Daniyeli Kelema y'o walawalan. A ka fo la, a tun fura ko suman hake min be soro, o soro. Temé yere kera da folen kan senefen suguya dow ta la.

Toni 4.580.000 tun ka kan ka soro senefen mume na. Temé kera o kan. Toni 4.814.871 soro. Toni 1.607.647 ye malokama ye; tóni 1.364.469 ye sañi ye; tóni 1.048.688 ye keninge ye; tóni 740.108 ye kaba ye; tóni 40.793 ye fini ye; tóni 13.166 ye alikama ni senefen suguya wereye, min be wele nansarakan na «orge». San 208/2009 sene kanpani nesinna malosene ma kerenkerennya la. O siratige la, goferenaman ye sefawari miliyari 10.049.000.000 don angere la ani ka miliyon 54 don malosi la ka di senekelaw ma. Ka kurandi

mansinba do san 112.300.000, San mara tilebinyanfan maloforow sonni kama. Senekelaw yere ka bota kera 12.900.000.000 ye angereko la ani miliyon 36 malosiko la.

San 2009/2010 sene kanpani na, sinsin kera malosene, kabasene ani alikamasene kan. Koorisene y'a 4an ye, goferenaman be wari don olu seneni dafe. A jirala k'o kanpani in na, suman toni 6.139.820 bena soro. Malokama toni 2.003.040 b'o la; kaba toni 1.546.975 b'o la; sañi toni 1.376.807 b'o la ani keninge toni 1.138.561. Goferenaman be ka dabaliw tige, walasa sumanba ka soro. A jirala k'o senekela minnu be deme soro goferenaman fe, olu ka suman sansongo be sigi. Sene minisiri y'a jira k'u ni senekelukulu ka cidenw be nognon lafaamuya o hake la.

Dine kono, cakeda min nesinnen be dunkafa sabatili ma n'o ye «PAM» ye, minisiri y'o fo a ka baara numan na. PAM ye suman san senekelaw bolo. A b'a sanni min ke

juraw bolo, a y'o dabila ka segin senekelaw ma. A tun b'a k'o cogo de la sanni juraw ka don u ni ngocen ce.

Songo sigili suman na kabini a ma sene, o ben'a to senekela minnu ye deme soro, olu ka nafa bo u ka baara la. Daniyeli Kelema ka fo la, senekela minnu te juru soro waribonw na ka sumansiw ni angere san, olu ka kan k'u wasa don goferenaman taw la. O yamaruya be senekelaw bolo. Angere be san cakeda minnu na goferenaman ka songo sigilen na, olu be taa u ka angeresongo to dafaw mine waribonw na. Mali seneko nemogoba Daniyeli Kelema labanna k'a jira ko malosi min ye Nerika kati (4) ye, k'o toni 2.500 be bolo la kaban. A kilo kelen be soro doreme 30 la.

Sene minisiri ka fo la, san 2009/2010 sene kanpani musaka be se sefawari 139.500.000.000 ma.

Moriba Kulubali
Dokala Jara

Posoni kufetifiyeli senefenw na, o kasaarantan te

Forosene ni nakosene, joyoroba b'olu la Mali kono, k'a sababu k'u soro cogoyaw ye. Mali be soro min ke san kono, kemesarada la 42 be bo forow ni nognon nafa la. Nka o n'a ta bee la, ntow ni fenjenama werew de be foro ni nakosoro nagasi. Walasa k'o tijenifenw kelle, Mali be posoni toni 5.400 don o dafe. A musaka be se sefawari miliyari 17.ma. O posoni hake fana kemesarada la, 90 nesinnen ke forosene ma. Posoni fiyeli nakolafenw na, o kasaarantan te u dunbaaw ani sigida n'a lamini na.

Nakosoro ye yoro neemamayoro ye, min be fenjenamaw ni baganw wele. O de koson nakobaaralaw 'b'u gen ni posoni ye, u kan'u ka nakosoro.

Sidi Keyita min ye posoniko nedonbaa ye sigida n'a lamini lasaniyali nemogoyaso la, o y'a jira ko nakotigi caman te posoni suguyaw don ka bo nognon na. Posoni hake min ka kan ka fiye nakosoro, u t'o don. Furanc min fana ka kan ka don fiyeliw ni nognon ce, u t'o fana don. A ka fo la, caman ta ye kufetibaara dan ye. Ko hali n'a dow be nafanin soro u ka nakosoro, kufetibaara in kono na, u be ke sababu ye ka dugubakonomogow ka keneya don bogos la. Olu minnu y'u ka nakolafen fanba dunbaaw ye. Posoni fiyeli nakolafen na fiyecogo jugo la, a be don a kono. A t'o be don dugukolo jukoro, ka taa se fo dugujukoroji ma k'o tije. Posoni be ji woyotaw fana tije.

Fenjenama min mana se ka balo nakolafen ni ji posonimaw na fo ka fanw da ka toro, o fenjenama suguyaw fagali be gelyea ni posoni ye. O de koson sisian sosow silatunun man di.

Juma Jabate
Dokala Yusufu Jara


San 2050 waati la, kaba tena se ka sene sahelikungo kono

Kojenjininaw y'a jira ko yanni san 2050 ce dugukolo be sebekoro kalaya Afiriki kono; min nognonna ma deli ka ke folo. Jiriw be balo dugukolo nafamatien min na n'o be wele nansarakan na ko «carbone», o be dogoya. O waatiw mana se, Afiriki mogow na gelyeaba soro. Misali la Lesoto min jatelen jamana nemanenba ye Afiriki kono, kaba suguya min be sene Mali la, ale bena a nesin o seneni ma. Mali ye Afiriki funtenimabajamanaw do ye. Jamana minnu ye Burukina Faso, Cadi, Mali, Nizeri, Senegali ani Saralon ye, olu tena se ka kaba sene san 2050 waatiw la. O b'a soro olu ka senekedugukolow sebekoro kalayara ka damatem.

AMAPU y'a naniyaw waleya ka wasa

Kunnafo ni n'a dicogo kura minisiriso ka lajekeso kono «AMAP» nemogojekulu y'a ka laadalatonsigi 25nan ke zuluyekalo tile 9san2009. Ajemogoya tun be Madamu Jara Mariyamu Filance Jalo bolo. Ale ye kunnafo ni n'a dicogo kura minisiri ye. AMAPU nemogoba Solomani Darabo ka fara cakeda in nemogojekulu tow kan, mogosima tokolaje in na. Dine gelyea n'a ta bee, AMAPU ye baara ke ka wasa. A sera k'a ka lajini sabati.

Madamu Jara Mariyamu Filance Jalo yere y'o lajini in sabatili sementiya. A y'a jira ko AMAP tun ye naniya min siri mogow n'u bolofenw lagamuniko la kunnafoniseben «Essor» kono, kemesarada la a temena o kanni 163 ye. Lagamuni hake min be kejabaranin na, kemesarada la o lajini sabatira ni 115 ye. Do farali tele kumawaati kan o y'o seerew do ye. Lagamuni min be ke ni seben norotaw ye, o lajini sabatira kemesarada la ni 104 ye. Nin baara numan ninnu sabatili ma ne do farali ko AMAPka san 2008 baarakenafo kan.



*Kunnafo ni minisiri
ni AMAP nemogoba*

Ayelenna ka semiliyari 1 ani miliyon 383 ma. O sera k'a to AMAP ka miliyari 1 ani 832 soro ka baaraw nafala; kasoro a tun y'a jira k'a be miliyari 1 ani miliyon 773 de soro. Nk'a ye min don baaraw keli musakaw dafe, o ye miliyari 1 ani miliyon 342 ye. Kemesarada la o ye 98 ni murumuru 28 ye a ka san 2008 baarakenafo.

Lasina Jara
Dokala Yusufu Jara

Kunnafo surunw

1 - Nogojibon kuntaala jan : Ni nogojibon banbali be muso min na, o ka kan ka layi kise kelen nimi sogoma o sogoma. Ni min te se k'o ke layi kasa kama, o be se ka layi kasantan san tubabufurafeereyoy (faramasi) la. A be layi tige - tige ka ke ji kalan litiri tilance la, k'a nefela ko n'o ye. Ni nogojibon meennenn don muso la, a b'a ke kise fila ye. Nka n'a ka di a ye, a be layiji in ke fiyebaranin kono.

2 - Laada juguman (gangekonodimi) : Laada juguman be muso min na, o be peresili bolone 1 ke ji kalan litiri tilance la ka to k'o min fo ka laada ban. Lere saba o saba a be dowera dila k'o min.

3 - Den ka kasi banbali : Den min be kasi tuma bee la, i b'a segesegé n'a ka kusiww jiginnen don. I b'olu bo ka dowera don a la. I be den ta ka yaala n'a ye. Ka to ka kuma dumanninw fo a tulokoro. Ka tulon k'a fe. I be tulonkefenninw mankan bo a nekoro; walima ka donkiliw bila arajo la. Farigan fana be den bila kasi banbali la.

Winegiri jugu do be ka feere, posoni don

Jarela Bamako kaburudo yoro la, du do be yen mangasaw kelen be k'a lamini. Wuluwuludinge b'a kono o dunya be metere 2 bo. Ji juguba b'o kono. Mananin kelen be k'o kunnana fa. Barikon lankolonw, batiri koro, manabidonnin lankolonw ani seben kunkurunnin caman, sebenniw be minnu kan. U be noro manabidonnin ninnu na. Nin bee be dingeba in da la.

Wuluwuludinge in te dowera ye Gindo n'a terike Konate ka winegiridila izini ko. Mog fila ninnu kofora polisiw ye kokolosiba do fe. Sabula sanga ni waati bee la, wotoro do falen be bo du in kono, winegiribidonninw caman be karitonw kono. U tun be wuluwuluji in ji ta ka batiri ninnu ni asidiji do k'o la. Gindo ni Konate ka winegiri dilacogo file. Sigida feerekela misennin caman tun be winegiri san u bolo kosebe. Winegiri lagamusebennin min norolen be bidonninw na, o jojan ye santimetere 18 ye, k'a josurun ke santimetere 4 ye. Seben in sanfela la, a sebennin be nansarakan na «Vinègre 6». Numanfekun na, karotiw ni oberiziniw ja be tangili do kono. Kininfekun taw ye seriziw ani tamatiw ja ye. Tangili fila ninnu ni nogon ce, tangili binkenema do

be yen, Mali togo sebennin b'o kono. Polisiw ye lagamusebennin min fililen soro nbeda kan, a sebennin tun be Mali togo numan fe «Fab : 2008»; ani k'a seben togo in kinin fe «Ex : 2012». O b'a jira ko n'o lagamusebennin norolen be winegiribidonnin min na, o dilala san 2008; a te dun bilen san 2012 kofe. KA laban ka lagamuni were ke sebenfurarin in kan ko «pour vos plats, exiger (la) vinègre de qualité». O bamanankan ye ko n'a' be dumuni o dumuni dila ni kumu be k'o la, a' ye nin winegiri in wajibya; ale de ka ni o la. Nka winegiridila izini lasorocogo sebennin te sebenfurarin in kan.

Mog jugu ninnu koni n'u ka winegiri kolonw minena. A to ye ka segesegeli ke k'a don u ka winegiri ye mog hake min bana, ani ka hake min faga. Sabula ji jugu ni asidiji faralen don nogon kan, k'o wele ko winegiri. Posoni dan bee don. Fo nin kunnafo ka da mogow tulo kan teliya la. Nin winegiri kofolen in mana ke feerekela ni mog were minnu bolo, u k'a don ko mogfagaposoni b'u bolo.

Gameri A Dicko
Dokala Yusufu Jara

Manden Bori, Bata Manden Bori walima Abubakari filanan sera kogaji kofe

San 7 kono, baarakela 30 000 jera ka kurun 2000 dila gundo la Banjuli. Gawusu Jawara ka nininiw y'a jira ko Mandenkaw ye bolo bon san 1310, ka yelen kogaji kan, ka taa walasa k'a don ni dijne werew be kogaji Atilantiki kofe, ni mogow werew be yen minnu ni Manden be se ka bo nogn kalama ka je.

Taamadenw n'u bololafew an'u ka minenw : Masake, Manden Bori n'a furumuso Salimata, an'a ka namakalaw-sango Jeli Fode Kuyate, a ka jeliba tun be nogn fe taama in na. Tontigiw ni moriw, tun be taama in na. Dijne don o don, masake n'olu tun be nogn ye, ka nogn faamuya sann'a k'a da suf, sann'a ka kuma mogow fe sogomada fe. Olu bolen ko yen, kogojikantaama donbaga nana sugandilenw dijne nef, Kogaji ja tun negennen be misigolo kan minnu bolo, olu d'ow ninina kerkenkerennya la taama in kama; olu tun be Manden ka bila la tuma b'ee taama in senfe ka kurunbolilaw bilasira. Cikela, jagokela, bololabaarakela, kuma te'keledenw ma, tobilikekaw ani furakelikelaw, fo ka taa se yoroladonnaw ma ani. mogoladonnaw, b'ee n'a ka baara tun don, olu caman tun be taama in na walasa ka taa Manden kura sigi Kogaji kofe. Fen o fen tun be soro Manden o waatiw la : suman, sumansi, sokonobaganw, jiriden, jirisine, dugujukoronafolomafen, makojefen, baarakemin, maramafen, o b'ee do tun be taamadenw bolo. Manden donniya k'orow, a basiw, a kilisiw, a dasiriw, fen o fen tun be se ka ke sababu ye ka Manden kura sigi noggoya, o b'ee tun be mandenmasa n'a n'ofejama bolo.

Kurunw cogoya Kurunbaw janya tun be se nongone 40 ma, k'u bonya ke nongone 10 ye, k'u kono dunya ke nongone 4 ye. Ntuloma kelen tun turulen be'keledenw ka kurunw kere kelen-kelen na; kelen tun ye kobobilan ye, to kelen tun ye saran

ye, olu ye Manden jiri d'ow ye. Kolonkala kelen tun sirilen b'o ntuloma ninnu na, ka nsiraden kise ni ntabakunba kisew ke' k'olu masiri. Koorokaara tun negennen be kolonkala ninnu kan k'a nesin kurun ninnu kunyanfan ma. Taama in na, kurunba, kurun mankan ani kurun fitinin b'ee tun masirilen don ni dabaliw ye, bimogow te minnu koro don, nka u tun dabokun ye ka kurun ninnu kisi ji balawukow ma, a sitanemafenw n'a jinemafenw, ani taamalaw yerew ka fognogonkow. Daga donn'enw tun be kurun kelel-kelen kono. Jilasogoba min b'ee wele tubabukan na "Dofen" daga ninnu tun dilalen be k'u sawura ke o sawura ye. Manden jiriw faraw, buluw, diliw, an'u wofonw toibilen jiw kirisilen tun be daga ninnu kono. Muso minnu tun be taama in na, olu ka daga tun donn'en don ni jiri minnu ye olu tun ye tiriba ye, kunba ani duta. Cew ka dagaw tun donn'en don ni nere, jonba, ani kolobokalaba ye. Don o don, sogomada, ce ni muso, denmisen ni maakoro, b'ee tun b'i bolokonindenkunba ni jaseere su nogn fe daga donn'en ninnu kono k'a mun u ten na sije kelen. Kalakise tun be kurun kelen-kelen b'ee kun na k'a nun ke sanu ye, ka gere fila ke u la. O gerew jengecogo n'u yelemacogo n'u mununmununcogow fe, kurunbolilaw tun b'a don u tun ka kan ka min ke.

Geleya folo, o bora masake muso fanfe : Taama damine na, Manden Bori muso Salimata tun fari foninen don. Dumuni duman, tulon ni yele an'a ce ka beerebeere liw ma k'otige. Nka taalen nef, don o don jikeneba, jikurubaw, finkolonbaw, taama dibabilabi, ni ji ni jilafenw te fosi were te yen; taama nana ke negebo ye, segen ani kamanagan. kurunkonomogo caman bolo fo n'a kera ce ni muso jolen kelen-kelenw ye. Nisondiya ye sira bila siran ni jore ne. Nenafin nana gan Salimata la. A bangebagaw, a balimaw, a teriw, a nana a ye olu b'ee taara ka dan ke.

Masakemusoya diya, a bonya n'a karamaw fana taara ka dan ke. A nana a ye hali a ka furu ni kanu be se ka to taama in dafe; bawo mogo t'a kuncetuma don, mogo t'a kuncetumogon. N'a y'a da k'a miiri, ko Manden Bori y'a ka dijelatige segen ni nani b'ee ke a dogoke Kankun Musa an'o muso Inare ka masaya diyaboli kama, a dusu b'a keje; a te se ka sigi, a te se ka jo, a te se ka sunogo. O k'ononafiliw k'onona na, Salimata y'a nini a ce fe u ka segin so. O kuma in ye jigilatige min da Manden Bori kan, o geleyara ni geleya ye. Manden Bori m'a fo'ow, a m'a fo ayi; nka taama in koni ma jo. Don do la, Manden Bori ko a muso ma sabali faamamuso. I dinena ni taama in n'a geleyaw ye cogo min na, a tun man kan e ka seginni kuma fo. Muso werew be yan, olu ma kule, munna e be kule? Kelekeden musoman 500 be jama na, olu ma kule, munna e be kule?

Saranje be jama na, kelekeden 50 ni k'obale kelen ka mara kono, o ma seginniko fo, munna e masaren to, e masakemuso to, e be seginniko fo? A laban na, Salimata dusu y'a keje. A jora janfa kan. A ni Manden Bori balimamusoden Madi tun da be file kelen na. U benna a kan ka jama lamuruti, ka Manden Bori karaba a ka segin so. U tun be nini ka se jama koro, ka seginni wajibya. Nka saya be kungo, Malo be so. Manden Bori ma son malo ma.

Geleya filanan kera banaw ye ani kasaaraw : Bo kera janfa kalama sanni a ka sira soro. Mogow o mogow tun y'a ntulomaw ye k'a bo Salimata yere la, olu minena k'u faga, k'u su fili ji la kasoro jama ma bo a kalama. O Kofe taama kuntaala janya fe, dumuniw nana dese doonin-doonin ani ji mintaw. Kongo ni minnogoye ani kogaji kasa n'a sumaya banbali, bana tora ka mogow faga-faga. K'o geleyaw to senna geji fana murutira sogomada kelen pewu ka kurun caman dafiri, ka mogow caman to ji la. Kurun kelen si ma ke

min kōnomogō dōw ma taa jiwoyo fe. Kurun caman bōra baara la bawo u tun te makonē bilen. Sēben minnu tun kera taama in kan larabuw fe ani moriw, ka fara tontigiw ka taamasiyen talenw kan, olu bēe tora ji la. Balo tōn tora ji la ani bololaminenw ani maramafenw.

Kōnw ka baaraw nēna

Folomogow tun be kōnw lamara, k'u balo ka nēna, k'u ke cidenw ye. O kōnō suguyaw caman tun be Manden Bori bolo. Dōgokun o dōgokun, a ka larabuke tun be taama in kibaruyaw sēben, a b'u siri kōnw na, k'u ci Manden jamanabaw nēmogow ma an'a naarabondaw. Kōnō ninnu tun be segin ni jaabiw ye fana. Hēre ni hēre tana, ko kēlenw ni ko yelenw, nin bēe kibaruya sera Manden, taama in kan. Nka kasaaraw barika bonyalen, sēbennikela caman taara woyo fe. Kōnw jatigēko jugu, olu caman taara u-kunfe, u n'u tigiw tununna nōgon na. O la, kunnafon i tigera taamadenw ni Mandenjamana ce.

Tjēne dara kēne kan : Jeli minnu y'an karamogō Gawusu Jawara ladonniya, jeli bulontigiw ani jeli belelajow, olu ko "Mogo be dōonin fo ka dōonin to i kōnō". Tjēne yēre-yēre la, Manden Bori n'a ka jama to sera Ameriki gun kan. U ni siya folo min ye nōgon kūnbēn o ye mōgo bilenw ye, a be fo minnu ma Endiyenw. O kēlen min ke, Manden Bori ka jeliw ye foli lamaga.

O kēlen minke, u jatigiw y'a dōn k'u nakun te kēle ye k'u bisimila. O don, foli ye Manden bō bolo la. O don jeliw ye Manden bō bolo la. O don Manden Bori y'a terikē larabuke tōgo da a sigiyōro folo la. O tōgo tun ye Iburahimu Izimayeli; o de laban kera BEREZILI ye dalateliya la. Bure ni Banbuku fanaw tōgo dara, Manden sanu bēe tun be bō yōrō minnu na. O yōrō in be wele bi dalateliya la. PURINANBUKU. N be nin fo bawo bi ma kow bila senna. Fosi te ke gansan. Gansan fana ma fosi ke. Nin bēe be dōnni dē kōnō. Dōnni be kunkolo kōnō. Kunkolo be bunahadamaden na. Bunahadamaden be dijē kōnō. Dijē be ji kōnō. Ji be fijē kōnō. Fijē be fufalaki kōnō. Nin bēe be Ala ka masaya kōnō.

Mahamadu Konta

Nininikelaw ye jirisiñē kura caman sōro

Jirisiñē silakolokolocakeda do be Mali kōnō min ni «IER» be baara ke nōgon fe. O cakeda ye «URG» ye. A dagayōro ye Jikorōninpara ye. Madamu Goro Aminata Goro y'a baarakelaw do ye. A y'a jira ko jiridenta suguya caman be URG bolo, minnu te sōro Afiriki fan wēre fe. A b'a nini jiriforotigiw fe, u kana jiriw kūnjigin (tige) samiye fe. U kan'u kūnjigin tilema funteniba waati fana na. A ko jiri kūntigewaati numan ye ɔkutoburukalo ni desanburukalo furancēw ye. O b'a sōro dugujukorōji ma jaman kōsebe. Funteniba waati b'a sōro dugujukorōji jīginna, jiriw dili t'a nēema sōro bilen. Ni jiri be kun jīgin, a bolo bēe te tige ka bō a la. Jiribolo kelen be to a la. Jiri be ninakili kāne o koson. Tigeli b'a to jiri ka bolo kura caman bō; jiriden sōrotā ka caya ka tēme kōrōlen kan.

Jatemine na jiri min ka jan kōsebe, o te den caman ke. Tigeli be jiri masurunya dugu la. A suma be bonya, a denw lasorōli fana be nōgoya. Mankorosun mana san 5 sōro, a te sōn don o don tuguni; a be se ka sōn sīne fila dōgokun kōnō. Nka a tigi k'a janto a la, k'a ladon nōgoko la a nafa ka bonya. Nin waleya ninnu matarafali b'a to jiri ka denko fila ke san kōnō.

Jirisiñē silakolokolocakeda in be a ka jirisiñē feere. Mankorosun ni lemurusinew be feere dōrōme 150. Tubabusunsun, karaboliye, «Jaquier», «pommier rouge», olu sīnew ye dōrōme 100 ye. Buyaki gerefelen ni ntōmolōn geeren sīnew ye dōrōme 300 ye. Papayi solo ye dōrōme 70 ye. Namasa Amerikani fana be yen. O dentusu kelen ye kilo 30 ye. Namasa surunnin fana dentusu kelen ye kilo 35 ye. O namasa suguya fila ninnu sīne be sōro «URG» la.


Moriba Kulubali / Dokala Yusufu Jara

Ségeségelekela ka san 2008 seereyaseben

Ségeségelekela Sidi Soso Jara y'a ka san 2008 ségeségelei seereyaseben di jamanakuntigi Amadu Tumani Ture ma Kuluba zuluyekalo tile 13 san 2009. Jamanakuntigo nēmogow tun b'a kēne kan.

San 2008 seereyaseben y'a jira ko sefawari miliyari 98 kunmaniyara jamana ma. O waris kofolen in na, Sidi Soso Jara ko miliyari 87 be se ka sōro nōgoya la. Cakeda minnu tun ségeségera ka tēme, ka sira numan don u kōrō, ségeségelekela ka baaraw bolila olu waleyacogow jatemine kan. A ka fo la, cakeda ninnu be ka baara numan ke sisan. Lañini minnu tun fōra u k'olu ke, kēmesarada la 80 bōra a sira fe.

Tuma min na ségeségelekela Sidi Soso Jara ye seereyaseben in don jamanakuntigi Amadu Tumani Ture bolo, o y'a jira ko kiirisében te; ko ségeségelei jaabisében de don. Ni cakeda min nēmogow ma sōn ségeségelekela ka jaabiw ma, o be se ka nēfoli ke k'a yēre lajeyā. Fen min ye faso nafolo tijēni ye, o sēbenw be don kiiritigelaw bolo. Jamanakuntigiye



Ségeségelekela be k'a ka seereyaseben di jamanakuntigi ma

foli ni tanuni lase minisiriw ma; kērenkerennya la minisiriñēmogō. Sabula ale de y'a nini ségeségelekela fe, a ka faso ka nafololamarasoba ségesége; n'o ye terezōri ye; walasa faso ka nafolo be dabolo min kan, o ka don.

Amadu Omaru Jalo
Dokala Yusufu Jara

Ben ni kotoñgontala ka ni seneke law ce

Ne ye Nónón serekili seneke law, baganmaralaw ani monnikelaw nemogoba dankan föl ye. N be bō Surukutu kilometere disiwi (Km 18) la Dogofiri komini kono. Dogofiri be zoni Kurumari fana kono.

Nónón serekili seneke law nemogoba kura Salifu Wedarawogo ka cesiri sababu la, zoni Kurumari ka yiriwalibaaraw bilala sira numan kan. Denmisén min don, a timina ka di kosebe.

A fölola ka seneke law fara nogon kan laje la Jabali, n'o ye zoni nemogoba dagayoro ye. Laje in korefow tun be seneke law laadi, u ka ben, ka ko to nogon ta la, k'u cesiri u ka baaraw fe. Nemogoba kura in ka fo la, ni ben ni kotoñgontala ani cesiri sabatira an fe, an be fen o fen nini, a ka ca a la o be soro.

San 2009 feburuyekalo tile 13, an nemogoba kura y'an wele kokura laje were la. O kun tun ye ka jisongoko kunnafoniw da an tulo kan. A y'a jira k'an be waati min na, kemesarada la 23 sarala maloforo kaze la; kabiyo n'o ye torikaze ye, kemesarada la 12 sarala o la. A y'a nini an fe, an k'an jilaja ka jisongow to sara yanni marisikalo tile 31 ce. O min ye



Ibarahima
Baba Jara

Segu mara senekeso ka laje la zuwenkalo tile 10 san 2009. O kun tun ye an ni Nansarajekulu ka cidenw ka sigi ka kuma, nogondeme sira fe. Nansarajekulu ka Ofisi geleyaw lakodon seneke law n'u nemogow fe; min b'a to u be je ka dabaliw tige geleya ninnu furakeli la. Zuwenkalo tile 12, an ye nogon soro kokura Madinekura. O ye seneke law ka lafasaliton «Segizagon» dagayoro ye. San kura baaraw bolodara o laje senfe. Seneke law minnu ye Ofisi ka sariyaw labato a nema, Salifu Wedarawogo ye bonyamaseginseben di olu ma k'u ka waleya numan lakodon u ye. N'o be wele nansarakan na «dipl me». Do dira senekuntigi numanw fana ma. Ibarahima Baba Jara ka bo Surukutu (K18) Dogofiri komini na Nónón

Poyi : Fasodennumanw

Fasodennumanw a' ye wuli k'a jo, Sigidaw nemogoyanini kalataw sera. Fasodennumanya ni sigi te ben.

A' ye wuli an k'an ka sigida nemogow sugandi, A' ye wuli an k'an nidungomogo sugandi. Fasodennumanya taamasiyen do ye kalata ye.

Fasodennumanw, a' ka dugujelenyenin y Mogo minnu k'u sigida ka bo nogo la, Minnu k'u sigida ka taa ne,

Aw ni fasodennumanya. Aw minnu y'a faamuya ko beeje fanga sinsinnan ye kalata ye,

Aw minnu k'a mago te te ni sukaro la, Aw minnu k'a mago te tiriko ni balon na, Kogo ni woro kerebete.

Sigi te mogo son. Fasodennumanw, a' ye wuli ka kala ta. Sigidaw nemogoyanini kalataw sera.

Da tugulen te se ka tasuma fiye. N'i y'i bolo fila da i sen kan,

Ko n sen te politikiko la, Politikimogow be' bele k'i nimino na.

N'i k'i da te politikikuma na, Fadenw ka politikimogo talenw n'a gan ka sigi i kun na.

Fasodennumanw, a' ye wuli, An kana nimisadon ye.

Mara te segin so ni kala numan ma ta. Isa Jalo ka bo Kodugu Dugabugu komini na Kati

Sariya labatoli nafa ka bon

Mekalo la, lakanabaaw ye sariya min ta, o mana to sen na, sirabakasaaraw be dögoya. N'o ye motobolila ka gitronba bila, ka to kerefesira kan.

Misali la ka bo Falaje ka babili kura teme, motottigiwajibiyalen don ka sariya in labato. Sirabakankasaara dama min tun be k'o furance in na, dan tun t'o la. Nogoyaba donnen b'a ko la sisan, sariya labatoli senfe. Ni baara in tora sen na, lafiya be don sirabako la Bamako dugu kono.

Fen min ye baloko fana ye, o sariya be ka labato föl. Malojalanin be döröme 60 la halibi. Tige don geleya ban man di pewu. Nka ni mogo bee jora a joyoro la, nogoyaba be don ko caman na. Ala ka hakili numan di faamaw ma. N be polisiw fo u ka cesiri la.

Yaya Mariko ka bo Senu Bamako

Dogbatige be ka fiye bila Sikaso sanjiko la

Ne b'a nini kungo lakanani nemogoyaso fe, a ka sariya kura ta. An ka kungo tijena kojugu dogotigelaw fe. Ne jorelen don jiribatige in na. A be geleya min lase an ma.

Mogo min ye Sikaso mara kununnama ye sanjiko la, ka n'a bilama ye, a be siran. Fölo Sikaso mara sanjiko tun ye damatembe ye. Nka sisan ja be tijeni ke Sikaso mara la. Jiribatige y'o sababu do ye. Mogo be kungo jeni walasa u ka fere jiriw la k'u tige ka ke dogo feeretaw ye. Tige don hadamaden cayara sisan, nka min ka di n ye n b'o ke, o ye damatemewale ye sigida la. Geleya don, min kolo jugu be se jamana fan bee ma. Jiri bee mana tige sanji te na kosebe. O numan ye ka feere tige, min b'a to an ka kungojiriw kana ban, an ka kisi dogotigelaw mantooro ma. Mogo döw be yen n'olu tora u yere ma, u te numan ke.


Alasani Tarawele ka bo Kokuna, Kapolondugu komini na Sikaso

«Embalmali bε boreñumanwdila»

Goférnaman ye nōgoya min kε walasa kenyereyew ka se k'uka cakedaw dayεlε jamana kōnyiriyali siratigε la, okera sababu ye jekulu min bε wele nansarkan na «Groupe IPS» (Industriel Promotion Services, Afrique de l'Ouest) ka cakeda dayεlε min bε wele nansarkan na «Embalmali».

Sefawari fanga jiginni min kera, o y'a to Mali k'a nesin sene ani baganmara ma kosebe. Suman bε sɔrɔ, koɔri sɔrɔta fana cayara; kuma tε bagan ni jεge ma. Olu keminenko kera gεleya ye. «Embalmali» de ye fura sɔrɔ o gεleya la.

«Embalmali» san 10 ye ninan ye. A baarakεlaw timinan ka di kosebe. U bε borew dila, minnu b'a to mɔgɔw ka se k'u balofenw lamara ka ne, kabini u donwaati fo k'u dun ka ban.



Kalankene N° 84nan : Jamana fanga n'a jɔsenw

An kumana jamanadenyasebenw kan. N'i ka jamanadenyasebenw dafara, i be se ka waso n'i ka fasodenya ye. Jamanaden bεe ka kan fasodenya la sariya hukumu kono; si man fisani si ye. N'i bɔra sariya kofe, o ye fiye bilalen ye i ka fasodenya la. Jamanaden kelen-kelen bεe y'a dama fanga ye n'i be sariya kono, n'i be sariya don. Baga man kan ka ke i ma, k'i jalaki, k'i nangi, kasoro fanga min b'olo i m'o boli, k'i yere lakana, ka jo nini, ka jo soro. Faantanya ni faamaya t'o la, cεya ni musoya t'o la, kalannenya ni kunfinya t'o la, denmisenya ni maakɔrɔbaya t'o la. Jamana ye bεe lajelen ta ye. Jamana tɔgɔlafenw ye bεe lajelen je ye. Fanga sigikun ye jamanadenw lakanani ani heresorosiraw dayeleli ye, u ka djenlatige latemecogo numan kama. Mali be sira min kan bi, o be koba saba jira. Ni bεe y'o koba saba faamuya, sigi be diya, jamana be taa ne.

Fo, **Mali ye Erepibilikye** : o kɔro ye ko fanga te masaya ye Mali kono. A te bonda kelen na. Dannaya be mogɔ o mogɔ kan, n'a donniya n'a ladamu b'ala, jamabe se k'a sugandi ka ke fanga ye. Filanan, **Mali ye demokarasijamana ye** : o kɔro ye ko

jama de be fanga sigi, ka tila ka fanga bolicogo sigi. Ni fanga min ma jama ka baara ke, jama de b'a wuli ka bo yen, k'a sagolafanga sigi min be se k'a ka baara ke.

O b'a jira ko fanga ye jama ka baaraden sigilen de ye. Baara ka kan ka ne fanga bolo cogo min na, jama de b'o dantige ka bila fanga ka bolo kan. **Sabanan, Mali ye sariyajamana ye** : o kɔro ye ko jama tɔgɔlakow ani jamana tɔgɔlakow ka kan ka waleya sariya dantigelenw konojamanadenw ka here kama, ka yeresagoke, kufekoke, forobafenw tineni n'u sonyali ani binkanni ni tɔnɔniw bali, k'u kele. O dakun saba faamuyalen kofe, fanga jɔsenw, a ka kan jamanaden bεe lajelen k'olu fana don, k'u faamuya; bawo olu y'an yerew ka kolabennenw ye, lakana, soro yiriwali ani ben ni lafiya sabatili kama. Nka n'an m'a nini k'olu don, k'u faamuya, an be laban ka siran u ne, k'u ke kabakofen werew ye, kasoro an bolokonofenw don. O la n'an m'an farati a be taa k'an bolo dan; bawo an be je ka wara faga, dɔw b'o golo biri u yere kan ka tɔw bagabaga.

Jamana fanga jɔsenw file nin ye : (An ye nin kibaruyaw soro CNR-ENF ka gafe kono min be wele **Ladamu ni fasodennumanya san sabanan**, a labenna san 2001, dugu yiriwalikalansow kalandenw

kama.) :

1 - "Jamanakuntigi (Peresidan) : Ale ye fanga kuntigi ye. Sariyasunba kɔlsibaga don, jamana ka yeresmahɔrɔnya lakanabaga don. Jamanakuntigi ye sariyatigi fo, ye. Finitigw ka nɛmɔgɔba don. A be jamana kelenya sabati. Ale de be goferenaman nɛmaa sigi. A be se ka sariyatabulon ci n'o ye depitebulon ye.

"2 - " Goferenaman

(Minisirinɛmɔgɔ ni minisiri tɔw) : ka baara ye ka jamana politiki taabolo dantige ani k'a lataama. A b'a yere deme ni foroba cakedaw ni finitigw ye ka o baara in waleyà.

"3 - " Sariyatabulon (depitebulon) : Depitew ye sariyatabulon mɔgɔw ye. Depitew be jamana sariyaw wote.

"4 - " Kiiritigebulonba : ale de be kiiritigeda tɔw ka kiiri tigelenw segesegé k'a don n'u tigera sariya ni tine kan.

"5 - " Sariyasunba tɔgɔlakiiritigebulon : ale be segesegeli ke k'a don ni sariya sigilenw be jamana sariyasunba soro, walima n'u t'a soro. A be hadamadenw ka josariyaw lakana.

"6 - " Sanfekiiritigebulon : ale be jamanakuntigi ni minisiriw ka kiiri tige n'u no minena sariyatabulon fe, k'a sababu ke janfa jugu ye walima ko jugu werew.

"7 - " Sigidaw tɔgɔlabulonba : ale sigikun ye ka sigidaw ni maraw yiriwalisira be laje ji nɛmajɔlén na ani k'a felaw fo o ko lateminnen ninnu kan.

"8 - " Soro, hadamadenya, dɔnko ni sekotɔgɔlabulonba : abe kunnafoniw nini k'u sεben, minnu be tali ke jamanadenw ka san haminakow ni gleyaw kan.

A b'a hakililata di gleya ninnu nɛnaboli siraw n'a ferew kan, ka soro k'olu dajira jamanakuntigi, goferenaman ani sariyatabulon na."

Mahamadu Kɔnta

Dɔ be ka fara lakɔlikaramɔgɔya gleyaw kan

Sarakəbaliya waati la, o min kera jamana in kono ka teme, o digira dɔw ka juru sara, dɔw kunkolo tineni, duw kera jugusagow ni fadensagow ye u faso la ani sigida la. Dɔw yere kera yekofila ye k'u ka mogɔya don ngalama na...Nin san damado in na, gleya werew y'a kun-bo, ni fura ma soro o la, o ye ko juguba ye. O gleya ye mun ye? Lakɔlikaramɔgɔ bugoli lakolidenw fe lakoliso la. Kalanden k'a karamɔgɔ gosi, Ala ma djen n'o ye. Sariya si ma djen n'o ye djen kono. Bamako yan sisan, san o san, i b'a men ko lakolidenw ye lakɔlikaramɔgɔ jogin ani dɔwrew. Lafiyanugu lakoliso dɔla, Bamako, alamisadon, mɛkalo tile 14, san 2009. Lakɔlikaramɔgɔ Mahamadu Kamara, Matematiki karamɔgɔ don. Lakoliden kɔro dɔw y'ale son gabakuru la k'a jindren wolonwula bɔ k'a to a ka baara la kalanso kono kasoro a ma min a m'a bon.

Mahamadu Kɔnta

Dukene N° 60nan :

Denmisennin ka sunogo kolosili nafa ka bon

N'i den ye sunogolaba ye walima sunogolaba te, a mana ke dajoona ye walima o te, o si kana i jore. I ka kan k'i sinsin min kan, o ye a ka se ka sunogo ka fa ani a sunogocogo fana ka ne. Sunogo joyoro ka bon kosebe hadamaden kelen-kelen ka jenamaya sabatili la sango denmisennw. A be farikolo ni hakili lafiyali min ke o bolen ko yen, a be denmisennin kolo, a bu n'a fasaw labencogo ne an'u kogocogo numan fo ka taa se a balikuyali ma. Kabini a bange kalo folo, a ka sunogominenw sigili sen kan baaraw be damine a farikolo la.

Den mana bange, o waatiw ye sunogo kuntaala surun waati ye.

Obe damine kabini a fannama a ba debe la. Konomaya waati la, den sunogowaatiw n'a kununen waatiw be se kolosi ba fe. Ba mana sunogo a fana be sunogo. Ba mana kunun o b'o cogo kelen na. Ni bana wera te denyererenin na, a be Lere 16 sunogo tile o tile. Nka sunogo kelen-kelen kuntaala te teme miniti 50 kan walima

Kunnafoni numan

ka jesin musow lakanani an'u ka netaa ma

Dine tonba bolofara min jesinnen be denmisennin demeni ma n'o ye «Unicef ye, o ni kunnafoni n'a dicogo kura minisiriso y'u bolon bila kunnafoni sabatili seben do la alamisadon zuwenkalo tile 11 san 2009. A kera kunnafoni n'a dicogo kura minisiriso ka lajekeso kono. Kunnafoniko sabatili seben in tegnobilali laje nemogoya tun be Madamu Jara Mariyamu Filance Jalo bolo.

Cakedaba 4 minnu be Mali kono ka jesin kunnafoniko ma, n'o ye «AMAP», Arjomali, batakiw bilayoroba n'o ye positi ye, ani «CESPA», olu nemogobaw tun be laje in kene kan.

Seben in konoko be boli fen min kan kerenerennenya la, o ye dabali waleyataw ye, minnu b'a to mogow b'u jogo juguw dabila, k'u jesin musow lakanani an'u ka netaa sabatili ma.

Osiratigela, «UNICEF» b'a nini kunnafoniko cakedaba 4 minnufe, uka sigidalamogow sebekoro ladonniya ni kunnafoni nafamaw, ja faranfasilenw, ani siniman numanw ye, fo ka taa se yelma donni ma tenburuw cogoya la, min b'a to mogow be laadilikan balolenw soro. Nin waleya ninnu matarafali minenko ani musakako la, «UNICEF» b'a jo n'olu ye.

Kunnafoni n'a dicogo kura minisiri Madamu Jara Mariyamu Filance Jalo ye foli ni tanunilase «UNICEF» ma, nin baara numan in senkoromadonna. Batakiw bilayoroba n'o ye positi ye, o sendonni yiriwalibaraw la, a y'a jira k'o ye ko nafamaba ye.

Lasina Jara / Dokala Yusufu Jara

60; kasorobaliku be se ka lere kelen ni tila ke sunogo la (sanga 90). O waatiw la, su ni tile sunogo te denmisennw ka jate kono.

K'a ta kalo 3 la ka se 6 ma : o waati la, denmisennin be baliku ladege sunogocogo la. Danfara be don su ni tile sunogocogo la. Sufesunogo kuntaala be janya ni tilefesunogo ta ye. O san hakew kono, a be se ka lere 9 ke sunogo la. Fine samacogo k'a bila, dusukun ninakilicogo, ani farikolo nafalanw samacogo sunogo konona na, olu bee be sigi sen kan doonindoonin. Dumunikewaatiw, ani dumuni suguya duntaw, tulonkewaatiw, ani sunogowaatiw, olu dantigecogo be danfara don denmisennw ka sunogoko la.

K'a ta kalo 6 la ka se san 4 ma : denmisennin baliku bee sunogocogo be ke kelen ye. Tilefesunogo kuntaala be surunya kosebe. Kalo 6 waatiw la ka se 12 ma, a ka sunogo te teme sije 3 fo 4 kan. Kalo 18 waatiw la, tilefesunogo be se ka dan sije kelen

ma. San 3 ni san 5 waatiw la, sunogo kuntaala be dogoya kosebe k'a ben lere 12 noggona ma tile kono.

K'a ta san 4 na ka se san 12 ma : o waatiw la, denmisennin ka girinkajow ka bon tile kono. Su mana ko doron a be sunogo. A ka tilekoncunogo kuntaala be dogoya ka taa a fe, ka bo lere 12 la ka jigin.

Ni geleya donna denmisennin ka sunogocogo numan na, kolosili b'a to bangebaaw ka se k'a ka sunogolaben ka ben n'a waati korew ye; walima ka waati kuraw boloda, minnu b'a to ni tilefeta ni sufeta bee be soro, u hakelama minnu be keje denmisennin si hake ma. Nin kunnafoniw soro la Doctissimo kono.

Mahamadu Konta

Kunnafoni surunw

Kono girinya konomaya la : konomaya kalo 9 kono, konobara girinya b'a ta kilo 10 na ka se 12 ma : den girinya b'a ta kilo 3 la ka se 4 ma, tonso y'o la garamu 500 ye; denso girinya be ben o la garamu 1500 ma; den be balo ji min na o girinya ye garamu 1000 fo 1500 ye; joli ye garamu 1000 ka se 1500 ma; sinji be se garamu 900 ma.

Nbuuru joyoro ka bon kussemme ni hakili sinsinni na :

denmisennin ka nbuurudun sogomada fe o koro ka di. A b'a hakili dayele. Kunkoloseme girinya te teme farikolo girinya 2 % kan; nka a mako be galabu min na, o be ben farikolo mumu mako be galabu min na, o 20 % ma. Kunkoloseme be galabu mara ka se sanga 10 noggona ma. Tuma bee a mako be galabu la. Nafamafen do be nbuurul la ko gilisemi, o be galabu caman lase denmisennin kussemme ma. Nk'a kolosira ko n'i ye denmisennw sigi keme o keme, 36 doron de be se ka nbuuru soro k'a dun daraka la.

Ami Wasiji, Direyi sorofekɔnɔ

Mali kɔrɔnyanfan nənajekɔlɔ ka ca. Fisa Mayiga, Hayira Aribi; Ayisa Alamirije. Ali Farika ma ke mɔgɔ dogolen ye dijɛ kɔnɔ. Ale de kera Afiriki jamanaden folo ye, min jansara «Gramy Awards» fe. Doolo kura falennen be Mali kɔrɔnyanfan fe tuguni, min tɔgɔ ye Aminata Wasiji. Nk'a be wele Ami Wasiji. A si be san. 31 na ninan. Direyi lakoliso kolosibaa den don Tumutu mara la. Arajomali ka nənajebə min be wele nansarakan na «Top Etoiles», Ami Wasiji lakodɔn o kene kan. Mɔgɔ finman don, a man jan. A don «Top Etoiles» ni bi cɛ, Ami Wasiji ka dɔnkiliw nege ma bo mɔgɔw la. Burudamɛmuso in ka dɔnkiliw ka ca. Min be sebekɔrɔ lamɛn o ye «Tilyaden» (sungurunniñw) ye. A ka alibɔmu fɔlo dɔnkili filanan ye Tamala Mayiga ye. O ye kɔrɔborɔw ani Direyi fasa ye.

Ami Wasiji te jeli ye. Uka denmisenkulu la, ale de tun be dɔnkiliw da, u be je ka tulon ke. Lakolikaramogow fɔlo la k'a ka sanga jatemin dɔnkilikola. Okofe a kera Direyi nənajekulu dɔnkilidala ye. Hali n'a ka dɔnkilida tun man di a fa ye, Ami ma se k'a yere soro mɔgɔw bɔlo. Tumutu mara nənajekulu labanna ka wele bila Ami Wasiyi ma. A fa bora dugu min na ka na sigi Direyi, oye Ariseji ye Direyi serékili kɔnɔ. Walasa Ami ka ne sɔrɔ kosebe a ka baara la, a tugura Adama Yalonba ko dɔnkili lamine na. O kera sababu ye a ka se k'a ka alibomu fɔlo laben. Mali



Ami Wasiji

marabolow ka konseyejekulu nəmɔgɔ Umaru Agi Mohamedi Ibarahim. Ami dème o wariko la kosebe. Alibomu in dɔnkiliw dalen be kan fila de la : burudamɛkan ani kɔrɔborɔkan. A ka dɔnkili kɔnɔ, a be to k'a fɔko «Ma fal war tighimin fal manawan». A b'a fɔa ka siya mɔgɔw ma burudamɛkan na ko munna u t'u yere to u danbe la.

Ami ka fɔla a wasara; sabula dɔnkilida min tun y'a haminako fɔlo ye a ka nənamaya la, a sera k'a yere bila o cemance la. Geleya te ban mɔgoya la. A furu sara ka bo a cɛ fɔlo kun. Bi bi - in na o sigilen be Gwo. A ye den kelen soro o furu kɔnɔ; o si be san 8 na ninan. Geleya filanan o ye sigiyɔrɔ degun ye. N'o ye bənbaliya min be Malí kɔrɔnyanfan mɔgɔw ni nɔgɔn cɛ.

Gameri A Diko

Dokala Yusufu Jara

Mayikoli Jakisoni ka saya




Mayikoli Jakisoni tun ye dɔnkilidala ye ani dɔnkɔlaba, farafin don, lameriken don. Dijɛ denmisennikanmɔgo tundon. A fatura jumadon zuwenkalo tile 26 san

2009. A ka saya balala mɔgɔw la; sabula bana kərenkerenn si tun t'a la, a tun be ka nənajebə dɔw laben yere. San laban ninnu na, sariyatigiw tun wulilen b'a nɔfɛ k'a nɔ bo jogojuguya caman kunkan. O togötijew n'o nafolotijew, ka fara fura caman tali kan walasa dɔ ka bo a ka dusukasiw la, dɔw ka fɔla, a sata bora olu de la. A ka janaja fanga bonyara cogo min na, o y'a jira ko Mayikoli Jakison ka nafolo, a ka togɔba in, a ka sanga, a y'olu soro baara ni cesiri de la. A ye sanga soro kabini a san 12. A ye san 40 ke sanga in na, a sanga ma bin tile kelen. O kɔrɔ ye k'a y'a si bee lajclen ke baara la; bawo sanga mara man di hali san 1 kuma te san 40 ma. Mahamadu Konta

Sinimandilala Adama Darabo fatura

Adama Darabo tun be jate Afiriki sinimandilala nənaw fe. A fatura arabadon zuluyekalo tile 15 san 2009, Pɔnze dogotorosoba la Bamako. A lakodonna kosebe san 1991 waatiw la, a ka siniman jan folo fe, min be wele «Ta Donna». O kera sababu ye Adama Darabo ka wele sinimanjirakene caman kan Nansarala. A ye lakolikaramogoya de kalan ke. A bangera Bamako san 1948. A ye san 10 ke lakolikaramogoya la. San 1968 ni 1969, a ye lakolidenw kalan Karaya. O be Kayi mara la. Ka laban ka lakolidenw kalan Koyon, Sirakorola komini na Kulukoro mara la. Okera san 1976 ni 1979 furancɛw la. Negen (desen) fən o fən be Koyon lakoliso fɔlo ni Sirakorola lakoliso folow



Adama Darabo

kɔnɔ, o bee ye Adama Darabo no ye.

San 1979, a yelemana sinimandilalaw ka cakeda la. «Ta Donna» kofe, a ye «Taafe-Fanga» dila san 1997; «Neba» dilala san 1987; «Fanta Fanga» dilala san 2009. «Taafe-Fanga» ye sara fɔlo soro Farafinan sinimanjirakene «FESPACO» kan Burukina Faso. Adama darabo ye sinimandilala Seki Umaru Sisoko dème a ka «Namanton» labenni na san 1986, ka laban k'a dème ka «Finzan» dila san 1989.

Adama Darabo ka baara konona na, a ye muso bonya ka tanga da a kan. A ka sinimanw «Kokaje» ani «Taafe Fanga», olu b'o sementiya. Faransijamana ye medayidɔdi Adama Daraboma. A fatura ka muso kelen ani den 7 to a kɔ. A teriw, a somogow, an'a kanubaaw n'a baarakɛnɔgonwjerà ka taa a bila a dayɔrɔ laban na Majanbugu kaburudo la.

Yusufu Dunbiya
Dokala Yusufu Jara

Gine Konakiri jamanakuntigi nege bora jamanadenw na

Musa Dadi Kamara min ye fangadafiri ke Gine Konakiri san 2008 desanburukalo la, o tun ma ka di jamanadenw ye kosebe. Sabula a tun y'a jira ko jamanakuntigisigikalata bëna ke teliya la walasa jamanadenw ka u nikanmögö sugandi ka sigi jamana kunna. A tun y'a jira fana, k'a be yeresagoke ani yuruguyurugu dabila Gine kono. Nka kalo wooro Musa Dadi Kamara kelen ko ka fanga ta, jamanadenw ye tigeli damine a la. A te k'a ka layidu taalenw tiims. Jamana were mögöw fana dalen te a ka laadiriya la tuguni. Konakiri kono, mögo sebe t'a yere sëgen tuguni ka bë ka taa Musa Dadi Kamara kumbenniyoro la. Kasoro a ka fanga tawaati la, sirabadaw ni lajekoyorow tun be fa a kanubaaw la. Mögo ma min fo a siriyoro la, a kan'o fo a foniyoro la. Musa Dadi Kamara y'a jira kosa in na, k'a be pankurun da gelen do san a yere ye. Sabula ko Afiriki tilebinyanfan fe, ko pankurun be jamanakuntigi bee tögo la. O pankurun in musaka be se sefawari miliyari 7 ani miliyon 800 ma. Musa Dadi Kamara ka nin naniya kura sirilen in bennet te jamanadenw ma hali döönin. Geleya ba min be jamana kono fura te nini o la föl. A be nini ka ke sorobanagami dan bee ye Gine kono. Lakolikaramögöw hakili la ko sariya bëna ta u tögo la min b'a to u be lafiya. Duşukasi fe, u tun y'a jira k'u t'a fe k'u sendon lakolidenw ka zuwenkalo kiimënibaaraw la. Kuranko tun te laboli ke Konakiri kono kasoro fangadafiri yere ma ke. Kuran dan tun ye lere 8 dörön ye tile kono. Sisan tile 3 be ke dibi la tuma döw la. O dibi jugu ni lakanabaaw ka farifaga kelen sababu ye ka binkanniw caya Gine faaba kono. Soronadonna do ka fo la, tuma caman na sisan, sorodasiw yere be to ka mine sonyali la ka maramafénw to u bolo. U be mögöw bagabaga ni maramafénw ye k'u bolofénw mine u la. Musa Dadi Kamara ko mögöw ka yeresagoke be kele. O keleko te nin 13. O

sorodasiw fe de.

Lamerikenjamana demedenjekulu min be wele angilekan na «Human Rights Watch», o y'a nini sorodasifanga fe, a ka sorodasi kojugubakelaw nomine k'u nangi. O lajini in waleyali ka gelen Musa Dadi Kamara bolo. Sabula yeresagoke cu jenen be sorodasiw de bolo Gine kono. Misali la hali jamanakuntigi koro Lasana Konte tile la, lakanabaaw nemögöba Kulodi Piwi tögo fora ka fara mögo wærew kan, minnu ye ta ke jamanadenw k'la olu ka nisongoyataama do senfe. Mögo caman tora muguda la o la.

Hali fen min fana ye yuruguyurugu këlesi ye, siga b'o yere la. A foro ko faso nafolo kunmaniyabaa minnu ka kouew ka sëgesëge, da te ka don o la halibi. Olu be u mago la jamana kono u jorelen te hali döönin. Fen min ka jugu nin bee ye, Lasana Konte tile la, mögo minnu mago tun te jamanadenw ka here la, Musa Dadi

Kamara be k'olu ta sisan ka bila cögöbaw la jamana kono. Misali la Tibu Kamara min tun ye kunnafoniko minisiri ye, o kera Musa Dadi Kamara ka dugutaakow cögöw la ye sisan. Fodeba Isito Kera min fana tun ye Lasana Konte masurunnamogöye, o kera denmisenyakow minisiri ye bi. Kunnafonisëbenw fana y'a jira ko Zenerali Sekuba Konate min ye Gine lakana minisiri ye, k'o ye sefawari miliyari 15 yuruguyurugu. Minisiri y'a jira k'ale ye wari in don sorodasifiniw na ka di sorodasiw ma. Kapiteni Musa Dadi Kamara yere min ye jamanakuntigi ye, o y'a jira kunnafonidilaw la, u ka dan u danyorla. Ko n'u te fanga demi a ka baara la, u kana ke fanga senkörcebaaw ye. A ye nin fo kunnafonidilaje do senfe san 2009 in mekalo tile 10, a ka fanga dagayoro la Kan Alifa Yaya kono.

Fabiyenri Mariten
Dokala Yusufu Jara

Tulon


Nin ja fila dilanbaga y'a dabo a kama ka fili 10 k'u la. A y'olu nini



Jaabi

- 1 - Cekrdba ka fügula. 2 - Cekrdba ne. 3 - Cenin ka kep. 4 - Gabakuruw ja. 5 - Tendä nügu d. 6 - Jiridibilen fo nefe. 7 - Cekrdba ka fini negen d. 8 - Sinsinbere. 9 - Cekrdba ne. 10 - Cenin kndbara.

Amaduni Kola Sise sigira ka ke Mali ntolatanko nəməgəba ye



Mali ntolatanko Federason ka lajeba kuncera Tumutu ni Hamaduni Kola Sise sigili ye nəməgəya la. Salifu Keyita n'a jənəgən kelen k'u joyorə labila, joyorəniina saba y'u kanbo nəməgəya nofə : Musa Konate, C.O.B pəresidan, Bubakari Baba Jara, o ye polisi nəməgo ye ani Kola Sise, o ye Mali sariyako Minisiriso baara n'a nafoloko nəməgo ye, Moti ntolatanko nəməgo fana don: wotew nəməgəya tun bə Mamadu Bacili Daramə bolo ka bo Kayi ntolatanko nənabojekulu la, n'o ye "Ligi" ye. Nəbilajateminew y'a jira ko wotekela məgo 18 tun bə Kola Sise bolo, məgo 17 tun bə Bubakari Baba Jara bolo, məgo 3 dərən tun bə Konatekə bolo. Konatekə tun b'a fə ka fara Jarake kan; nk'ale tun bə peresidanya dərən de nofə. N'o tun kəra, Jarake ka məgo tun bə ke 20 ye, a tun bə se soro. Ben ma ke olu fila ni nəgon ce minke, woteko nəməgo labannə ka se di Hamaduni Kola Sise n'a ka məgəw ma. Kola sigilen nəməgəya la, a ko ale ka lajini folo ye Mali ka se ka taa san 2010 kupudiməndi ani kupudafiriki la. A ko fana a ben'a cəsiri bənbaliya min bə Mali ntolatanko la ani denjuguya ni nəgonmakosa, ka fura soro olu la. A y'a kan di farikolojenaje Minisiriso ma walasa jəkabaara ni nəgofaamuya ka sinsin Mali ntolatanko la. Nin tun y'a siyə filanan ye Kola Sise k'a kanbo Federason peresidanya nofə.

Modibo Nama Tarawele
Jibirilu Kaba
Mahamadu Konta

Kupu "CAF": Sitadi boko fələ gəleyara

Sitadimaliyen donna kupu "CAF" kurunbə laban kono. O sababuya la, a bə kulu min na, a ni ntolatanton damado ka kan ka nəgon kunben taakasegin na. Olu ye Pirimeyirodagositoye ka bə Angola, Bayelisa Yunayitedi ka bə Nizeriya, Harasi əli Hodudu ka bə Eziputijamana kan. Sitadi ni Angola Pirimeyirodagositoye nəgon soro sibridon zuluyekalo tile 18 san 2009 Bamako yan. O ntolatan in kəra 0 ni 0 ye. Tanko filanan na, utikaloye 1, Sitadi ni Nizeriyakaw ka Bayelisa Yunayitedi bə nəgon soro. O kəfə a bə taa Eziputikaw fə yen, n'o ye Harasi əli Hodudu ye tanko sabanan na utikaloye 14 san 2009. Utikaloye 30, a bə tila k'ə ntolatanton kelen in bisimila Bamako yan tanko naaninan na. Setanburukalo tile 12, Sitadi ni Angolakaw bə nəgon soro kokura komasegin na, o bə ke Angola tanko duurunan na. Setanburukalo tile 19, Sitadi ni Nizeriyakaw bə nəgon soro Bamako yan tanko woɔrənan na. Afiriki ntolatanko Federason ye sefawari miliyon 75 di Sitadi ma a ka labənw sabati. O wari in na, miliyon 7 ni tila bə di Mali Federason ma. Sibiri təmenen in ntolatan na Sitadi ni Pirimeyirodagositoye cə, i n'a fo an y'a jira cogo min na, o kəra fu ni fu ye. Sitadi ka ntolatansen tun ka ni. Ntolatan damine na fo ka taa se a laban ma, a tun bə Angolakaw kan. Nka a ka nəfəməgəw de kəra a fiñəmayoro ye; bawo u ye bi caman laben nk'u ma se ka hali kelen pewu don, jawuli, teliyako jugu, sengoya ani garijəgentanya y'a sababu ye.

Solomani Bobo Tunkara / Mahamadu Konta

Federasonbaw togolakupu ntolatanw kəra Afirikidisidi

Ntolatan federasonba min bə Amerikigunkan, jamana fila nana o togo la : Lamerikenjamana ani Berezili. Ntolatan federasonba min bə Eropu gun kan, jamana fila nana o togo la : Esipajni ni İtali. Ntolatan federasonba min bə Azi gun kan, jamana kelen nana o togo la : Iraki jamana. Ntolatan federasonba min bə Afiriki gun kan, n'o ye KAFU ye, jamana fila y'o joyorə fa : Afirikidisidi ani Eziputi. Ntolatan federasonba min bə Oseyani gun kan, jamana kelen nana olu togo la : Nuwəlizelandi. Ninjamana ninnu de ye bəe dan u ka gun kan. O koson, u nana Afirikidisidi nəna damaw ka nəgonkunben kəne kan, n'o ye Federasonbaw ka ntolatan ye. Jaabi minnu soro ntolatanba ninnu senfe olu file :

Tako folo : Afirikidisidi ni Iraki : 0 ni 0. Esipajni ni Nuwəlizelandi : 5 ni 0. Afirikidisidi ni Nuwəlizelandi : 2 ni 0. Esipajni ni Iraki : 1 ni 0. Afirikidisidi ni Esipajni : 0 ni 2. Iraki ni Nuwəlizelandi : 0 ni 0. Berezili ni Eziputi : 4 ni 3. Lamerikenjamana ni İtali : 1 ni 3. Berezili ni Lamerikenjamana : 3 ni 0. Eziputi ni İtali : 1 ni 0. İtali ni Berezili : 0 ni 3. Lamerikenjamana ni Eziputi :

3 ni 0. Takofilan (Demifinali) : Esipajni ni Lamerikenjamana : 0 ni 2. Berezili ni Afirikidisidi : 1 ni 0.

Joyorə sabanannini : Esipajni ni Afirikidisidi : 3 ni 2. məcənəbə kəfə.

Joyorə fələjini : Berezili ni Lamerikenjamana : 3 ni 2.

Jamana minnu ye Federasonbaw ka kupu in ta ka təmə olu ye : Arizantini san 1992 ; Danemariki san 1995 ; Berezili san 1997 ; Məkisiki san 1999 ; Faransi san 2001 ; Faransi san 2003 ; Berezili san 2005 ; Berezili san 2009. Nin y'a siyə sabanan ye Berezili ka kupu in ta.

Solomani Bobo Tunkara
Jibirilu Kaba Mahamadu Konta

«AMAP» kuntigi
Solomani Darabo
-Mali kanw kunnafonisəbenw
baarada kuntigi
Nanze Samake

Kibaru
BP : 24 Telefoni: 20-21-21-04
Kibaru Bugufiyə Bosola
Bamako - Mali
Sebennijekulu
Mahamadu Konta, Dökala
Yusufu Jara
Labugunyoro : Kibaru gafedilan
baarada
Bəlen həkə 16 000